

- प्रधानमंत्री नरेंद्र मोदी काले नुवी दिल्ली मांय इंडिया एआई इम्पैक्ट एक्सपो-2026 रो उद्घाटन करेला।
- कृषि मंत्री डॉ. किरोडी लाल मीणा कयो-प्रदेश रो बजट महिला, नौजवान, काश्तकारां समेत सगळां रा कल्याण सारू समर्पित है।
- प्रदेशभर मांय महाशिवरात्रि रो पर्व रीत मुजब धार्मिक उमाव रे साथे मनायो जावे।
- टी-ट्वेटी क्रिकेट विश्व कप 2026 मांय अबे ऊं कुछ देर पछे भारत अर पाकिस्तान री टीम आमी-सामी व्हेला।
- राज्य मांय घणखरी ठोडां दिन रा तापमान मांय बढवार-सांझ-सवारा गुलाबी ठंड रो असर बण्योडो।

0000

प्रधानमंत्री नरेंद्र मोदी काले नुवी दिल्ली मांय इंडिया एआई इम्पैक्ट एक्सपो 2026 रो उद्घाटन करेला। पाँच दिन रो ओ एक्सपो इंडिया एआई इम्पैक्ट समिट 2026 रे साथे आयोजित करयो जावे, जिण रे मार्फत आर्टिफिशियल इंटेलिजेंस रा व्यावहारिक उपयोग री नुमाइश करी जाएला। ई एक्सपो मांय ऑस्ट्रेलिया, जापान, रूस, यूनाइटेड किंगडम, फ्रांस, जर्मनी, इटली, नीदरलैंड्स अर अफ्रीका समेत 13 देशा रा पवेलियन लगाया जाएला, जो एआई हलका मांय दुनिया री मदद ने दरसावेला। एक्सपो मांय 300 ऊं बत्ती नुमाइश पवेलियन अर लाइव डेमोंस्ट्रेशन व्हेला। कार्यक्रम री रूपरेखा तीन खास मुद्दां- पीपल, प्लैनेट अर प्रोग्रेस साथे है। आं मांय 600 ऊं बत्ती स्टार्टअप ई हिस्सो लेवे। आयोजन रे दौरान 500 ऊं बत्ती सत्र व्हेला, जिण मांय न्यारा-न्यारा हलकां मांय एआई रा असर अर भविष्य री आस साथे बतळ व्हेला।

000

प्रधानमंत्री नरेन्द्र मोदी 28 फरवरी ने अजमेर ऊं प्रदेश ने 23 हजार 500 करोड़ रिप्या रा विकास कामां री सौगात देवेला। मुख्यमंत्री भजनलाल शर्मा सोशल मीडिया पोस्ट मांय आ जाणकारी देवता कयो के ई दौरान श्री मोदी केई परियोजनावां री नींव धरेला अर लोकर्षण करेला। साथे ही वे रोजगार उत्सव मांय 21 हजार नौजवानां नियुक्ति रा पाना ई सूपेला।

000

गृह मंत्री अमित शाह कह्यो है के केन्द्र सरकार देश रा काश्तकारां रा हितां सारू बरोबर काम कर री है। श्री शाह आज गुजरात रा गांधीनगर रा महात्मा मिन्दर मांय देश री पहली केंद्रीय बैंक डिजिटल मुद्रा वाळी सार्वजनिक वितरण प्रणाली री सरूआत करण रे पछे आ बात कही। वणा विपख रा दावां रो खंडन करता कयो के भारत-अमरीका व्यापार समझौता अर भारत-यूरोपीय संघ मुक्त व्यापार समझौता मांय काश्तकारां, मवेशी पालकां अर मछुआरां रा हितां री हिफाजत बणायोडी राखी ज्यी है।

000

आज अंतर्राष्ट्रीय बाल कैंसर दिवस है। ओ दिन दुनियाभर मांय टाबरां रा कैंसर रा बारा मांय जाग जगावण अर इण ऊं पीडित टाबरां, बाळकां अर कैंसर ऊं उबर चुक्या लोगां अर वां रा पिरवार वाळां सारू समर्थन जुटावण सारू ओ एक विश्व थर साथे सहयोगात्मक अभियान है।

जयपुर री बाल कैंसर रोग विशेषज्ञ डॉ. शिवानी माथुर बतायो के टाबरां मांय कैंसर रो इलाज जवान लोगां रे मुकाबले चुनौती वाळो है फेरु ई कैंसर ऊं ठीक होवण वाळा टाबरां री तादाद बत्ती है। वणा बतायो के बगत सर डॉक्टर ऊं मिल लियो जावे तो कैंसर रा असर वाळा टाबरां ने ठीक करया जा सके है।

000

वणा ई बात माथे जोर दियो के वाजिब देखभाळ अर सलाह ऊं अ टाबर सार्थक अर सक्रिय जिन्दगी जी सके है।

000

कृषि अर ग्रामीण विकास मंत्री डॉ. किरोडी लाल मीणा कयो है के प्रदेश रो बजट महिला, नौजवान, काश्तकार, मजूर अर आखिरी लेण रा लोगां रा कल्याण सारू समर्पित है। आज सवाईमाधोपुर जिला कलक्ट्रेट सभागार मांय खबरनवीसां साथे बतळ करता वणा कयो के 6 लाख 10 हजार 956 करोड़ रिप्या रा आकार वाळो ओ बजट 2023-24 री तुलना मांय 41 फीसदी बत्ती है। वणा कयो के ई बजट मांय सवाईमाधोपुर जिला रा विकास सारू ई खास प्रावधान करी ज्या है।

000

प्रदेशभर मांय आज महाशिवरात्रि रो तिवार रीत मुजब धार्मिक उमाव रे साथे मनायो जावे। सवारा ऊं ई शिव मन्दिरां मांय आस्था रो सैलाब उमड़ रियो है। शिवालयां मांय बम-बम भोला अर हर हर महादेव रा जयकारां री गूंज है। महादेव रा दर्शनां अर अभिषेक सारू शिव भक्तां री लेणां देखी जावे। केई ठोड़ां मेळा ई भरीज रिया है अर आखो माहौल भक्तिपूरण बण्योडो है। राजधानी जयपुर रा शिव मन्दिरां मांय ई सवारा ऊं ई भक्तां रो आवणो लाग्योडो है। ताडकेश्वर महादेव मन्दिर मांय सवारा 3 बज्यां भस्म आरती रे पछे श्रद्धालुआं सारू कपाट खोली ज्या। वठे ई कोटा रा शिवपुरी धाम मांय 525 शिवलिंग रा दर्शन सारू भक्त सवारा ऊं आ रिया है। उदयपुर रा एकलिंगनाथ मन्दिर मांय ई भक्तां रो हजूम उमड़ रियो है। भीलवाडा रा हरणी महादेव मन्दिर मांय चार पहर री खास पूजा रो आयोजन कर्यो जावे। डीग जिला मांय ई शिवरात्रि तिवार माथे शिव मंदिरां मांय खास अभिषेक अर पूजा अर्चना रो दौर चाले। चूरू मांय प्राचीन बारह महादेव मन्दिर मांय मेळो भरी ज्यो अर शिव पार्वती री शोभा जातरा निकाली ज्यी। पाली जिला मांय सादडी रा पहाड़ां माथे जूना परशुराम महादेव मन्दिर मांय सवारा ऊं भक्तां रो तांतो लाग्योडो है। सवाईमाधोपुर जिला रा सिवाड मांय घुश्मेश्वर महादेव मन्दिर मांय ई घणी तादाद मांय श्रद्धालू पूग रिया है। अलवर रा जूना त्रिपोलिया महादेव मन्दिर मांय खास पूजा-अर्चना करी जावे। राज्यपाल हरिभारू बागडे महाशिवरात्रि पर्व माथे सगळा रा मंगल री कामना करता बधाई दी है। आज जयपुर मांय व्हीया शिवोअहम कार्यक्रम मांय मेळा व्हेर वणा भगवान शिव रो अभिषेक कर्यो। मुख्यमंत्री भजनलाल शर्मा मुख्यमंत्री रेहवास रा मां राजराजेश्वरी मन्दिर मांय पूजा-अर्चना करने प्रदेश री खुशहाली अर प्रगति री कामना करी।

000

उदयपुर मांय सैलाणिया ने बधावो देवण सारू सज्जनगढ अभयारण्य मांय विकसित लॉयन सफारी री सरूआत काले व्हेला। म्हारा खबरनवीस बतायो के ई अभयारण्य मांय सैलाणी तीन खास पॉइन्ट सज्जनगढ अभयारण्य, सज्जनगढ बायोलॉजिकल पार्क अर लॉयन सफारी रो आनन्द ले सकेला।

000

अजमेर मांय काले ऊं संभाग थर रो अमृता हाट मेळो भरीजेला। महिला अधिकारिता महकमा कानी ऊं लागण वाळा ई हाट मेळा मांय महिला स्वयं सहायता समूहां अर उद्यमी महिलावां कानी ऊं बणायी ज्या उत्पाद बिकण सारू मुहैया व्हेला। महकमा री निदेशक मेघा रतन बतायो के 22 फरवरी तांई चालण वाळा ई मेळा रो उदघाटन केन्द्रीय कृषि अर किसान कल्याण राज्यमंत्री भागीरथ चौधरी करेला। वणा ई संभाग थर रा मेळा मांय आवण री अरज करी है।

000

प्रदेश मांय घणखरी ठोड़ां दिन रा तापमान मांय बढवार व्ही है। तापमान बधण ऊं दिन मांय गर्मी रा तेवर निजर आवण लाग्या है। वठे सांझ-सवारां गुलाबी ठंड रो असर बण्योडो है। लारला चौबीस घंटा मांय 11 जिलां मांय बत्ती रो तापमान 31 डिग्री सेल्सियस रे पार रिकॉर्ड व्हीयो। ई बीचे मौसम महकमो आथूणी विक्षोभ रा असर ऊं 17 फरवरी ऊं राज्य रा केई ठोड़ां हळकी मावठ अर तेज हवा चालण रो अंदाजो जतायो है। 17 अर 18 फरवरी

ने जयपुर, अजमेर, जोधपुर, बीकानेर अर भरतपुर संभाग मांय कठे-ई-कठे मावठ होवण रा आसार है।

000

टी-ट्वेटी क्रिकेट विश्व कप 2026 मांय आज भारत अर पाकिस्तान री टीमां रे बीचे मुकाबलो व्हेला। कोलंबो रा आर प्रेमदासा स्टेडियम मांय होवण वाळो ओ मुकाबले कुछ ई देर पछे सरू व्हेला। दोन्यू टीमां अजे 2-2 मैच खेलने 4-4 अंक हासिल कर्या है।

000

पाली ज़िला मांय खोड गांव कने आज बस री टक्कर ऊं मोटरसाईकिल सवार दो लोगां री मौत व्हे गयी अर एक घायल व्हे गयो, जिण रो पाली रा मेडिकल कॉलेज अस्पताल मांय ईलाज चाले। वठे ई अलवर जिला मांय मोरेडा गांव मांय बिजली री लेण रा तार टूट जावण ऊं व्ह्या हादसा मांय 50 बकरियां री मौत व्हे गयी।

000

जयपुर मेट्रो रा पसारा रा काम ने बेगो सरू कर्यो जाएला। मुख्य सचिव वी. श्रीनिवास आज जयपुर मांय छोटी चौपड मेट्रो ठेशन रो जायजो लेवण रे पछे खबरनवीसां ने बतळ मांय आ जाणकारी दी।

वणा मेट्रो ने आधुनिक आवण-जावण अर सुविधा वाळो साधन बतावता जयपुर मांय इण रा पसारा री जरूरत जतायी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 22 फरवरी ने विचार बतावेला। आ ई कार्यक्रम री 131वीं कडी व्हेला। ई सारू आप ई मुफ्त नम्बर 1800-11-7800 माथे राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे ज़रिए ई 20 फरवरी ताई विचार भेज्या जा सके है।

0000